



Diepsloot e hwetša seteišene sa maphodisa se sefsa

Letlakala 7



Go beetšwe thoko R7 bilione ya mananeokgoparara a boemakepe

Letlakala 11

E na le Dibaka tša Mešomo ka Gare

Dira gore lentšu la gago le kwagale

Ongezwa Manyathi

MaAfrika Borwa bao ba nago le maswanedi a go kgetha ba tla hwetša sebaka gape go diriša ditokelo tša bona tša molaotheo go dira leswao la bona ka lepokising la go boutela mo Dikgethong tša Mmušo wa Selegae tše di tlogo tša 2016.

Ka go dira kgetho ya bona, maAfrika Borwa ga ba tliši fela temokrasi ya naga ya bona, eupša le go ba badudi ba mafolofolo ka go kgetha baetapele bao ba ratwago ke bona bao ba tla thušago go kaonafatša boleng bja bophelo bja bona.

Gore X ka moka ya bohlokwa mo pampiring ya go bouta e raloka tema ye bohlokwa ka go dira gore makhanselara a diwate ba boele morago go tša motheo ba abe ditirelo tša motheo.

Gore temokrasi ya naga ya rena e dule e tiile, maAfrika Borwa ba swanetše go tšea karolo mo Dikgethong tša Mmušo wa Selegae tša 2016.

Go ba le sebaka sa go kgetha go bolela gore maAfrika Borwa ba ka dira gore mantšu a bona a kwagale. Eupša se se ka se kgonagale ge batho ba sa kgonthiše gore maina a bona a gona mo lenaneong la go kgetha pele go tswalelwa.

Bakgethi bao ba nago le maswanedi ba swanetše ke go ingwadiša gatee fela, ka ntle le ge ba šutile kgauswinyane goba mellwane ya dilete tša bona tša go kgetha e fetotšwe. Se se bohlokwa ka gore maAfrika Borwa a mantši ga ba tsebe gore diwate tša bona di fetotšwe kgauswinyane.

Mo Polelong ya gagwe ya Maemo a Setšhaba (SoNA), Mopresidente Jacob Zuma o eleditše bakgethi ba maAfrika Borwa go ingwadišetša dikgetho.

“Ke rata go ipiletša go bakgethi ka moka bao ba nago le maswanedi go tšwa ka bontši go ya dileteng tša bona tša go kgetha le diteišeng go ingwadiša goba go mpshafatša tshedimošo ya bona, gore ba lokele tshepetšo ye bohlokwa ya temokrasi,” a realo.

Makgolo a dikete tša maAfrika Borwa ba theeleditše tsebišo ye nakong ya mathomo ya go ingwadišetša go kgetha mafelelong a beke ya Hlakola. Khomišene ya Dikgetho ya go Ikema (IEC) bjale e tsebišitše gore mafelelo a beke a go ingwadiša la mafelelo e tla ba ka la 09-10 Moranang 2016.

MaAfrika Borwa a go feta dimilione tše tharo ba eteše diteišene tša bona tša go kgetha go ngwadiša, go ngwadiša leswa goba go mpshafatša tshedimošo ya bona. Modula-setulo wa IEC, Morena Glen Mashinini, o re palo ya bakgethi yeo e etetšego diteišene tša go kgetha e be e menagane go feta palo ye e rekotilwego nakong ya mafelo a beke ya boingwadišo ya mathomo ya Dikgetho tša Mmasepala tša 2011.

Se se fetolela go koketšego ya 23% mo mošongwaneng wa go kgetha ge go bapetšwa le mafelelo a beke a boingwadišo a Dikgetho tša Setšhaba le tša Profense tša 2014.

“Se se tshepiša tše dibotse mo Dikgethong tša Mmasepala tše di latelago tša 2016 le tša ka moso,” gwa realo Mashinini.

Le ge e le gore mafelelo a beke a mathomo a boingwadišo bja bakgethi a fetile, go sa na le nako ya go ingwadiša. Bakgethi bao ba nago le maswanedi, bao ba se ba hlwago ba ingwadiša goba ba hloka go lekola tshedimošo ya bona, ba ka dira kgopelo ya go ingwadiša nakong ya diiri tša mošomo

> E tšwela pele letlakaleng la 2

Mmušo wa selegae o ka matsogong a gago!

Ingwadišetše go kgetha!

9 - 10 Moranang 2016

REPUBLIC OF SOUTH AFRICA

MMUŠO WA SELEGAE

Basadi bao ba sepedišago protšeke ya go aga ba aga magae ao a nago le seriti

Rirhandzu Nkombyani

Badudi bao ba dulago metseng yeo e we-lago ka fase ga Mmasepala wa Mogala-kwena e tla ba beng ba magae a seriti. Palomoka ya malapa a 60 go tšwa metseng ya Ga-Hlako le Taueatsoala ka fase ga Mmasepala wa Mogalakwena, Mmasepala wa Selete wa Waterberg ba tla holega go tšwa Lesolong la Go aga la Basadi la Kgoro ya Setšhaba ya Bodulo bja Batho.

Lesolo la Go aga la Basadi ke Protšeke ya Le-tsema leo maikemišetšo a lona e lego go agela di-hlopha tšeo di lego kotsing dintlo e lego: batšofadi, basadi, batho bao ba phelago ka bogolofadi le bana.

Ke protšeke ya tirišano ya Kgoro ya Bodulo bja Batho, Basadi bao ba lego ka Kagong ba Afrika Borwa le lekala la batšeakarolo gomme e swarwa ngwaga ka ngwaga mo profenseng ye tee goba tša go feta go gopola kgwedi ya basadi.

Lesolo la Go aga la Basadi le thomilwe ka 2006 gomme le agile dintlo tša go feta 500 nageng ka bophara go tloga mola le thomago.

Ge a bolela nakong ya moletlo wa Go aga ka setena le go thoma go aga woo o swaretšwego motseng wa Taueatsoala, Motlatšatona wa Kgoro ya Bodulo bja Batho Zou Kota-Fredericks o re protšeke e bontšha gore mmušo dikarolong ka moka tše tharo, o ikemišeditše go fa maAfrika Borwa dintlo tša seriti.

“Seo se lego bohlokwa le go feta ka ga lenaneo la Go aga ke gore go na le tirišano yeo e bonagalago gare ga mmušo, makala a praebe le badudi fela bao ba dirilego maitekelo le nako go kgonthiša katlego ya protšeke,” gwa realo Motlatšatona Kota-Fredericks.”

Motlatšatona Kota-Fredericks o re ba a tseba gore lefelo la Taueatsoala le wela ka fase ga Mmasepala woo o bego o na le ditlhohlo.

O kgonthišeditše setšhaba gore go šoganwa le ditlhohlo gomme mmušo o šoma ka maatla go hwetša ditharollo.

“Ke thabela go kwa gore metse ye mentši ya Taueatsoala e na le mohlagase le gore batho ba bangwe bao ba thušitšwego ke mmušo ba ipopile

ngatana go dira ditirišano go tšweletša mae, di-pampiri tša dintlwana tša boithomelo, mengato ya lehlapo le ditšweletšwa tše dingwe.”

Molekgotlaphethiši wa Pušotirišano, Bodulo bja Batho le Merero ya Setšo ka Limpopo, Makoma Makhurupetje o re kgoro e ikgafile go kgonthiša gore basadi ba a matlafatšwa gomme se ke bohla-tse ka protšeke ya dintlo yeo e abetšwego basadi bao ba bago le dikhamphani tša bona tša go aga go tloga ka 1994.

“Mo ngwageng wa ditšhelete wa go feta le wa bjale, Limpopo e file dikhamphani tša go aga tša basadi tše 12 diprotšeke tša go aga tše 5 900 tšeo di šomišitšego palomoka ya R507 123 551. Boikgafo bja rena bo tšweletšwa ka dibaka tše mmalwa tšeo di hloletšwego ditšhaba. Dibaka tša go feta 3.3 milione di hlotšwe ka thekgo ya mmušo ya lenaneo la dintlo, gwa realo Molekgotlaphethiši Makhurupetje.

GO AGA MAGAE AO A NAGO LE SERITI

Moholegi yo mongwe yoo a amogetšego ntlo ka baka la protšeke ye ke Joyce Ramashala (58) go tšwa motseng wa Ga-Hlako ka fase ga Mmasepala wa Mogalakwena.

Bophelo bo be bo le boima go Ramashala le balapa la gagwe bao ba feditšego mengwaga ye mentši ka gare ga mokhukhu wa diphapoši tša go robala tše pedi. Dinako tša dipula di be di le boima go lapa le.

Ge Motlatšatona Kota-Fredericks le Molekgotlaphethiši Makhurupetje ba etela legae la gagwe o paletšwe ke go fihla ka moo a thabilego ka gona.

“Ga ke na mantšu. Ke thabile ka gore re tla ba le lefelo leo re le bitšago legae. Ntlo e tla buša seriti sa rena,” a realo.

Moholegi wo mongwe Catherine Moreana (70) yoo a dulago ka ntlong ya diphapoši tše pedi yeo a e abelanago le lelapa la gagwe ba šupa. Protšeke ya dintlo e fetotše bophelo bja gagwe le bja balapa.

****Rirhandzu Nkombyani o šomela Mmušo wa Profense ya Limpopo.***



Tonakgolo ya Limpopo Stanley Mathabatha o beha setene mokgahlelong wa kaho ya ntlo e ntjha ya Mme Lina Marutha.



Baahi ba Motse wa Ga-Hlako le wa Taueatsoala Limpopo ba nehilwe matlo a hlomphehang ho dula ho ona le ba malapa a bona.

> E tšwela pele go tšwa letlakaleng la 1

mo ofising ya IEC goba ba ingwadiša ka matšatši a go ikgetha a go ingwadiša.

Bao ba ratago go ingwadiša ofising ya bona ya IEC ba swanetše go ba leletša mogala pele go dira peano. Se ke ka lebaka la gore ge naga e ntše e batamela Letšatši la Dikegtho badirišani ba bantši ba dikgetho ga ba be gona ka diofising, ka ge ba swaragane le go ruta batho ka dikgetho mo ditšhabeng.

BAFSA BA SWANETŠE GO INGWADIŠA BA BE BA KGETHE

Ge naga e keteka mengwaga ye 40 ya dikhuduego tša baithuti tša Soweto ka 1976, go a swanela gore bafsa ba swanetše go tšwa ka bontši go ingwadiša gore ba kgone go kgetha gore ba kgone go ba le

SEBAKA SE SENGWE SA GO INGWADIŠA

O se ke wa fetwa ke mafelelo a beke a boingwadišo bja bobedi bja Dikgetho tša Mmasepala. Diteišene tša go kgetha di tla bulwa nageng ka bophara go ingwadiša go tloga ka 8 mesong go fihla ka 5 mathapama ka la 9 go fihla ka la 10 Moranang 2016.

lentšu ka bokamoso bja bona.

Moloko wa bjale wa bafsa o swanetše go hlohleletšwa ke bafsa ba 1976 gomme ba ete pele go šireletša bokamoso bja naga.

Batho ba bantši ba sokotše kudu gore maAfrika Borwa ba kgone go phela nageng ya tokollogo gape ya temokrasi. Ge temokrasi yeo e lekwa nako le nako, seo ga se re gore ga go na tšwelopele ye e dirilwego go tloga ka 1994.

KE MANG YO A KA INGWADIŠAGO?

Go ingwadiša o swanetše go ba modudi wa Afrika Borwa; o be le le mengwaga ye 16 (o ka kgetha fela go tloga ka mengwaga ye 18); gomme o na le Puku ya boitsebišo ye talamorago, Karata ya Boitsebišo; goba Setifikeiti sa Nakwana sa Boitsebišo (TIC).

Bakgopedi ba tla swanela gape ke go fa atrese ya moo ba dulago moo go lego seleteng seo ba ingwadišago go sona.

Ge bakgethi ba se na atrese ya semmušo ba swanetše go fa bahlankedi ba dikgetho tshedimošo ye e lekanego ya moo ba dulago go kgonthišiša gore ba ingwadiša seleteng sa maleba.

NKA INGWADIŠA NENG LE GONA KAE?

O ka dira peano ya go dira kgopelo ya go ingwadiša nakong ya diiri tša mošomo mo ofising ya IEC ya selegae yeo e nago le maikarabelo a selete sa geno sa go kgetha.

KE SWANETŠE GO INGWADIŠA LEFSA NENG?

O hloka go ingwadiša lefsa ge:

- atrese ya gago ya bodulo e fetotšwe
- ge IEC e go tsebiša gore mellwane ya selete sa gago sa go kgetha e fetotšwe.

NAA O KA TSEBA BJANG GE E LE GORE O INGWADIŠITŠE LE GORE O INGWADIŠITŠE KAE?

Go lekola tshedimošo ya gago ya ngwadišo, o ka:

- romela SMS le nomoro ya gago ya boitsebišo go 32810 (R1.00 SMS e tee)
- lekola tshedimošo ya ngwadišo inthaneteng go www.elections.org.za
- lekola seteišeneng sa gago sa go kgetha nakong ya mafelelo a beke a ngwadišo (9-10 Moranang 2016)
- lekola ofising ya IEC ya selegae nakong ya diiri tša mešomo.

GO DIRA KGOPELO YA KGETHO YEO E IKGETHILEGO

Kgetho yeo e ikgethilego e dumelela mokgethi yo a ingwadišitšego, woo a ka se kgonego go kgetha diteišeneng tša bona tša go kgetha ka Letšatši la Dikgetho, go dira kgopelo ya go kgetha ka letšatši leo le beakantšwego pele ga Letšatši la Dikgetho.

Le ge go le bjalo, ga se mang le mang, yo a nago le maswanedi a go fiwa kgetho yeo e ikgethilego. Bao ba ratago go dira kgopelo ya kgetho yeo e ikgethilego ba swanetše go:

- ba mokgethi yo a ingwadišitšego
 - ba le puku ya boitsebišo ye talamorogo yeo e nago le pakhoueto, Karata ya Boitsebišo goba setifikeiti sa lebakana sa boitsebišo (dira kgopelo ofising ya Kgoro ya Merero ya Selegae)
 - fihlelela dinyakwa tša mohuta wa dikgetho tše di itšego.
- O ka dira kgopelo ya dikgetho tša go ikgetha ge o ka se kgone go ya lefelong la go kgetha ka ge o lwala, o le mogolofadi goba o le mmeleng, goba o ka se kgone go kgetha lefelong la gago la go kgetha ka Letšatši la Dikgetho.

Kgotla “Like” letlakaleng la IECSouth-Africa go Facebook goba re latele go Twitter @IECSouthAfrica go hwetša tshedimošo ye mpshafaditšwego ka matšatšikgwedi a mafelelo a beke ya ngwadišo.

NAA KE TLO KGETHA NENG?

Ka molao, dikgetho tša go ikgetha di ka dirwa fela ka tšatšikgwedi leo le laeditšwego mo tšhupadipakeng gomme go ka se dirwe karogo.

****Mothopo: Khomišene ya Dikgetho ya go Ikema (IEC).***

Go hwetša tshedimošo ka botlalo leletša IEC go: 0800 11 8000 ka dipotšišo tša gago tša dikgetho. Senthara ya kgokagano e bulwa Mošupologo go fihla Labohlano, go tloga ka iri ya bo 7 mesong go fihla ka iri ya bo 9 mathapama.

Dimilione di etela diteišene tša ngwadišo ya go kgetha

Priscilla Khumalo

Bakgethi bao ba nago le maswanedi ba go feta dimilione tše tharo go phatlala le naga ba etetše diteišene tša ngwadišo ya go kgetha nakong ya mafelelo a beke a ngwadišo ya mathomo kgauswinyane. Mo bathong ba 3 097 194 bao ba etetšego diteišene tša ngwadišo ya go kgetha, ba 692 730 ba ingwadišitše la mathomo, mola ba 1 086 958 ba ingwadišitše gape mo dileteng tša go fapana tša go kgetha gomme ba 1 317 506 ba kgonthiša le go mpshafatša tshedimošo ya ngwadišo ya bona mo seleteng sa go kgetha sa go swana.

Go bile le bafsa ba bantši bao ba tlilego, go bile le batho ba 544 552 ba ka fase ga mengwaga ye 30 bao ba ingwadišitšego la mathomo.

Tekano ya 54% ya batho bao ba ingwadišitšego la mathomo e be e le basadi. Go itemogetšwe se diprofenseng ka moka, ka ntle le Kapa Leboa, moo e bilego tekano ya 50/50 ya pharologanyo ya gare ga banna le basadi go ya ka meloko.

KwaZulu-Natal le Gauteng di bile le tekano ye e nyakilego go ba seripagare sa ngwadišo ye mpsha ka 24% ya dingwadišo tše difsa ka KwaZulu-Natal le 22.5% ka Gauteng.

Ingodisetse ho vouta!



Mmuso wa Lehae
o diatleng tsa hao

ka la 9-10 Mmesa 2016



REPUBLIC OF SOUTH AFRICA

POLOKEGO LE TŠHIRELETŠEGO

Diepsloot e hwetša seteišene sa maphodisa se sefsa

Noluthando Mkhize le Edwin Tshivhidzo

Seteišene sa Maphodisa sa Diepsloot seo e lego kgale se emetšwe, seo se lego leboa la Johannesburg, mafelelong se butšwe gomme go letetšwe go lwantšhana le bosenyi mo seleteng seo.

Seteišene se butšwe semmušo ke Tona ya Maphodisa Nkosinathi Nhleko, yoo a kgopetšego setšhaba go šireletša basadi le bana gomme ba šomiše dibopego tša selegae tša maphodisa go lwantšha bosenyi mo di-leteng tša bona.

“Tlhabollo e ba gona moo go nago le khutšo... Go tšwa gape go ditšhaba go kgonthiša polokego ya bona. Re swanetše go swarana ka matsogo go lwantšha bosenyi,” a realo.

Tona o file gape seteišene dinamelwa tše 21 tše difsa go matlafatša twantšho ya bosenyi mo seleteng.

Mmušo o šomišitše tšhelete ye e fetago R100 milione go aga seteišene sa maphodisa, seo se thomilego ka 2008.

Kago yeo e hloletše maloko a setšhaba dibaka tša mešomo tše 145 gomme ba thwetšwe bjalo ka bašomi ba kakaretšo gomme bafsa ba 200 ba tlahlilwe dikarolong tša go fapana tša kago ka Lenaneo la Katološo ya Mešomo ya Setšhaba (EPWP) le ka Lenaneo la Tirelo ya Bafsa ya Setšhaba.

GO ŠIRELETŠA BATHO BA DIEPSLOOT

Gape mo thakgolong go be go na le Mokhomisenare wa Maphodisa a Setšhaba wa Motšwaoswere Molefotenente-Kakaretšo Johannes Phahlane, yo a boletšego gore seteišene sa maphodisa seo se šomago gabotse se bohlokwa setšhabeng se sengwe le se sengwe.

“Bjalo ka Ditirelo tša Maphodisa a Afrika Borwa (SAPS), re thabile kudu ge go agilwe senolofatši se gore le holege, gore re matlafatšwe go direla le go šireletša batho ba Diepsloot ka bokgoni le ka katlego.

“Methopo ka moka yeo e beilwego seteišeneng se e tla šomišwa gabotse le ka botlalo go lwantšha bosenyi,” a realo.

Molefotenente-Kakaretšo Phahlane o tlaleleditše ka gore maphodisa ba na le maikarabelo go batho bao ba ba šomelago. O bontšhitše bohlokwa bja tirišano ye maatla gare ga maphodisa le setšhaba.

O boletše gore Afrika Borwa e gokile batho go tšwa dihlopheng ka moka tša setšhaba bao ba kgeregelago toropokgolong ya Johannesburg go kaonafatša maphelo a bona.

“Batho go tšwa diprofenseng tše dingwe le go tšwa dinageng tša kgauswi le rena ba tla toropokgolong ya gauta, e lego mothopo wa ekonomi ya Afrika.”

“Diepsloot, go swana le ditšhaba tše dingwe tša kgauswi, e tletše kudu gomme batho ba bangwe ba ka kgetha go dira bosenyi le tšhomišo ye mpe ya tagi le diokobatši, tšeo gantši di amanywago le polao, maiteko a polao, go betha le go kata. Ke swanetše go gatelela gore re tla tliša letsogo go lwantšhana le ditiragalo tšeo.

O boletše gore go lwantšha bosenyi, barekiši ba diokobatši, bomenetša le basenyi go bohlokwa.

“Re šogane gomme re tla tšwela pele le go šogana le maloko a rena bao ba šomišago leswao la rena la go hlomphega go dira tša go fapana le seo le se emetšego. Re ipiletša go ditšhaba go bega maitshwaro afe goba afe a mabe.”

Jonathan Sathekge modudi wa Diepsloot yo a tlilego go hlatsela pulosemmušo ya seteišene sa maphodisa sa Diepsloot, o buditše *Vuk'uzenzele* gore o ikwa a bolokegile bjalo ka ge seteišene sa maphodisa se setše se fediletšwe.

Re leboga seteišene sa maphodisa se sefsa ka gore se mabating a rena gomme se tla tšhoša basenyi,” a realo.

KABO YA DITIRELO YA PELE

Go tloga ka 2014, SAPS e be e le lesolong la mpshafatšo le kagolefsa ya diteišene tša maphodisa ka lenaneo la Kabo ya Ditirelo ya Pele (FSD).

“FSD e phethagaditšwe ke mmmušo gomme e etilwe pele ke Mopresidente go kgonthiša go hlompha ditheo tša Batho Pele tša go bea batho pele. Go ya ka se, ga se ra kaonafatša fela tebelelo le kwagalo ya dinolofatši tša rena, eupša re hlahlile maloko a rena gore ba ka kaonafatša bjang maitshwaro a bona ge ba šoma le batho bao ba etelago goba ba leletšago seteišeneng sa rena,” gwa realo Molefotenente-Kakaretšo Phahlane.

A tlaleletša ka gore lenaneo le nepištše go akaretša boprofešene mo tirelong.



Tona ya Maphodisa Nkosinathi Nhleko (wo ka gare seswantshong sa godimo) le Mokhomisenare wa Maphodisa a Setšhaba wa Motšwaoswere Molefotenente-Kakaretšo Johannes Phahlane ba butše semmušo Seteišene sa Maphodisa sa Diepsloot.

“Re bone phapano. Re dirile tšwelopele diteišeneng tša FSD tšeo re šetšego re di mpshafaditše goba re di butše. Re hlatsetše phihlelelo ya ditšhaba, pulo ya mafelo a tirelo ya maphodisa, go hloma tirišano ya batšekarolo le go tliša tirišano le setšhaba.”

Go ya ka Mokhomišinare wa Maphodisa a Setšhaba, maloko a SAPS ao a tla bago a šomela setšhaba a tla hlohletša go latela

molao, boprofešene, le tlhompho.

“Bosenyi bo swanetše go fela gomme, ka moka re swanetše go ikgafa gore re godiše bana ba rena, bao e lego baetapele ba gosasa, mo go Diepsloot ya go bolokega ye kaone.”

Tona ya Mešomo ya Setšhaba Thulas Nxesi, yoo a bego a le gona pulong, o eleditše setšhaba go šomiša dinolofatši tša mmušo ka maikarabelo ka ge di le moo go šomela bona.

Go lwantšha bosenyi le bomenetša

Dorris Simpson

Mopresidente Jacob Zuma o tsebištše ditekanyo tšeo maikemišetšo a tšona e lego go oketša maitekelo a go lwantšha bosenyi le bomenetša.

Ge a araba ngangišano ya Polelo ya Maemo a Setšhaba (SoNA), Mopresidente o re mmušo o tliša tlhako ya molao gomme o tšwela pele ka ditekanyo tše dingwe go lwantšha bosenyi le bomenetša.

“Lekala la Tobo ya Thoto le dirile mošomo wo mobotse mo ngwageng wa ditšhelete wa go feta,” a lemoša seo.

Lekala le feditše melato ya tobo ya dithoto ye 463 tšeo di bitšago R2 bilione la fetša gape la bona ditaelo tša go tswalela dithoto tše 342 tša boleng bja R2.8 bilione.

Palomoka ya R1.6 bilione e lefetšwe batšwasehlabele ba bosenyi,” gwa realo Mopresidente Zuma. Tšhelete ye e hweditšwe ka morago ga go nyakišiša ditiro tša bomenetša.

Mopresidente o tlaleleditše ka gore R11 milione e hweditšwe melatong yeo bašomi ba mmušo ba bego ba amega bomenetšeng le melatong ya go amana le bjona.

O bolela gore Molaokakanywa wo o Mpshafaditšwego wa Dikutollo tšeo di šireleditšwego o ahlahlilwe Sebokeng sa Palamente ngwageng wa go feta.

“Maikemišetšo a wona a magolo ke go fa babegi ba bosenyi tšhireletšo gore re kgone go lwantšha bosenyi gabotse le ka katlego.

“Molaokakanywa wo o Mpshafaditšwego wa Thibelo le Twantšho ya Ditiro tša Bomenetša le wona o

tla tsebišwa Palamenteng,” gwa realo Mopresidente Zuma.

Molaokakanywa o kaonafatša tirišo ya Molao wa Thibelo le Twantšho ya Ditiro tša Bomenetša gore go šoganwe le ditllohlo tša tirišo le go tšwalela dikgoba.

Molao wo mongwe wo mofsa wo o tsebištšwego ke Molaokakanywa wa Bosenyi bja Inthanete le Dilo tše di Lebanego le bjona, woo o beetšwego go tsebišwa Palamente mo seripeng sa mathomo sa 2016.

Bosenyi bja inthanete bo ka hlalošwa bjalo ka tiro ya bosenyi yeo e dirwago go šomišwa dikhomphutha le Inthanete.

DITLHABOLLO KA DITIRELONG TŠA MAPHODISA A AFRIKA BORWA

Ge re sa le ditabeng tša tšhireletšo, Mopresidente o tsebištše ditlhabollo tše pedi tše difsa mo Ditirelong tša Maphodisa tša Afrika Borwa (SAPS).

“Bjalo ka karolo ya mokgwa wa Morago go Metheo, Tona ya Maphodisa o tla tšweletša makala a go ikgetha a go šogana le diokobatši le bosenyi bjo bo amanago le lefase ka moka gammogo le dintwa le phatlalatšo ya dithunya mo setšhabeng sa rena.

Makala a a mabedi, gwa realo Mopresidente, ke Biro ya Tirišo ya Diokobatši ya Afrika Borwa le Biro ya Setšhaba ya Taolo ya Dithunya tšeo Di sego molaong le Bosenyi bja Dintwa tša Pele.

Lekala le tla wela ka fase ga Ofisi ya Molaodimogolo wa Nyakišišo ya Bosenyi bja Pele, yeo e tsebegago ka di-Hawk.



Mmušo o ikemišeditše ka go lwantšha bosenyi le bomenetša mo nageng.